



Le Signur é mia löm y mia salveza.

La ploania d'La Pli á tut comié da **Josef Kosta** (+ 15.01.2017, 50 agn) y ti fej les condolianzes plü sontides a düc i familiars. La vita eterna dáí, Signur, y confortele con to lominus!

- **Confirmaziun:** en **dedemesaledema ai 25 de iener**, ales 20:00, él te salf de calogna a Al Plan la encuntada de düc i geniturs dai mituns y dles mitans co va eniann a confermé. Düc é bel enviés da tó pert.
- **Ofertes** - tal pröm mez ann 2017 **mess gní menades demez** cöstes ofertes:

19.03. patronat-KVV	23.04. fonds de soliadrieté dal clero
26.03. Kassian-Tschiederer Werk	30.04. l'Università Catolica de Milan
14.04. oferta de Carsema "Misereor"	25.06. obolo de San Pire

Dötes les atres romagn ala dljia.
- **Joneza da Paur:** la joneza da paur met a jí en **curs da balé** fox, polka, walzer y boarisch con Isidoro Clara, dai 27 de iener (vendres) + 5 sabedes, te Ciasa dles Uniuns: dales 19:30 ales 21:00 por prinzipianc, dales 21:00 ales 22:30 progredís; cost 35,00 € por membri y 55,00 € por i atri. Informaziuns y prenotaziuns fina ai 25 de iener pa Andreas, ☎ 347 7032583.

1 enformaziuns y termins

Dlijia d'Al Plan: al ven lascé alessei che al gnará fat de maiús laurs de restaur tla dljia d'Al Plan. La dljia sará porchel slüta dal 26 de iener ennant, cina dan Pasca. Les messes y funziuns ia por l'edema gnará zelebrades te salf de calogna basete, cheres prefestives y dla domegna sará te salf dles manifestaziuns.

Oraziun: en jöbia ai 26 de iener ales 20:00, s'encunta te salf de calogna d'Al Plan le grup de oraziun con signor Sepl Granruaz. Düc canc é benodüs y é der bel enviés da tó pert.

Posta: i postins envieia der bel da ciaré do che les adresses sön foliec y stampes co ven por posta stimeneies ben adöm, o scemai da les baraté. Tal dagní ne gnará nia plü condüt fora la posta, te chi posc olache la misciun ne stimeneia nia.

„Encünda le Vangelo. Sce al va debojügn, adora ince padores!“

Francesco d'Assisi

Döt le bun a: Paul Feichter, <i>La Ila</i>	25.01.1937
Maria Maneschg ved. Comploi	26.01.1929
y a düc chi co á santennom y complesc i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina al **dedemesaledema** sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania
La Pli de Mareo
 Santa Maria dal Bun Consei

Ploan: Signor Heinrich Perathoner
 E-mail: ploania@gmx.net

Calogna Al Plan: 0474 501006
 Radio de Ploania: 93,00 MhZ



VAL BADIA
www.unitepastorala.org

Speranza nea

📖 **Is 8, 23b – 9, 3 | 1 Cor 1, 10–13.17 | Mt 4, 12–23**

Dal Vangelo do San Mateo:

¹²Do che Gejú â aldí, ch'an â sciüré Jan te porjun, s'ál retrat tla Galilea. ¹³Al á lascé Názaret, por jí a d'abité a Cafárnaum, co é dlungia le le, tal raiun de Sébulonn y de Náftali. ¹⁴Ciodich'al dea s'ademplí, ci ch'al é gnü dit tres le profet Isaía: ¹⁵La tera de Sébulonn y la tera de Náftali, la strada dal mer, la tera delá dal lórdann, la Galilea pagana: ¹⁶le popul co viea tla scürité á odü na löm lominosa; a chi, co viêa tal regn dal'ombria dla mort, ti él aparí na löm. ¹⁷Da danló ennant á Gejú motü man da encündé: Convertísse! Deache le regn dal ci é dampró. ¹⁸Dertan che Gejú passâ dlungia le le de Galilea, ál odü dui fredesc, Sciomun, nominé Pire, y so fre André, ai ea der tal sciüré fora la rei te le, ciodich'ai ea pesciadús. ¹⁹Y al ti á dit: Gnide do a me! I fajará fora de os pesciadús de jont. ²⁰Atira ái lascé danló söes reis y ti é jüs do. ²¹Da jí ennant ál odü dui d'atri fredesc, Iaco, le fi de Zebedeus, y so fre Jan; ai ea con so pere Zebedeus te barca y arjignâ ca söes reis. Al i á cherdé, ²²y atira ái lascé la barca y so pere y ti é jüs do a Gejú. ²³Gejú rodâ por döta la Galilea, esignâ tles sinagoghes, encündâ le vangelo dal regn y varía tal popul dötes les maraties y les soferenzenes.

I ponsun do

Nos cristiagn conesciun le discours dla "soveranité de Chelbeldio": mo i se stontun da sontí la forza creativa de söa regnanza. Y empó é liades a cösta parora de gran aspetatives, dandadöt la speranza te n monn de iustizia y pesc. Samben se damana cösta speranza da nos en prisc alt. Al ne sozedará nia zonza converjiun y chel o dí: nia plü damané ci che iu ô, mo aldí ci che le Singur ô; nia plü jí olá che iu ô, mo jí olá che le Signur va.

I periun

Signur, nosc Dio, nos chiriun en monn nō de iustizia y de pesc, desche Gejú s'al á lascé sontí. Fá fora de nos stromonc de töa iustizia y de töa pesc.

Por Crist, nosc Signur

Wilhelm Egger "Sonntagsbibel"

📖 **Letöres dla 4. domegna ia por l'ann:**

Sof 2, 3; 3, 12–13 | 1 Cor 1, 26–31 | Mt 5, 1–12a

Edema liturgica dai 22.01. ai 29.01.2017

DOM 22.	3. domegna ia por l'ann <i>Vinzenz, Walter, Teodolinda</i>
08:30	gran messa por dōta la ploania <i>oferta por i debojūgns dla ploania</i>
10 y 18	2. s.m. de sopoltōra por + Josef Kosta, Framacia y corona dla comunité <i>s.m. a Al Plan</i>
Lön 23.	<i>beat Heinrich Seuse, Eugen</i>
07:30	<i>s.m. a Al Plan</i>
Ded 24.	<i>Francesch da Sales, Vera, Arno</i>
07:30	s.m. en onú de Sant'André por la zeca da Pliscia
Dem 25.	festa dla Converjiun de San Paul, Susanna
18:00	<i>s.m. a Al Plan</i>
Jöb 26.	<i>Timoteus y Titus, Paula</i>
19:30	s.m. d'aniversar por + signor Matio Rigo s.m. d'aniversar por + Frieda Ritsch, Tomele da Rara s.m. por +ti Peslalz y Elliscases, Tlea
Ven 27.	<i>Angela Merici, Iulian, Manfred, Rosalia</i>
07:10	<i>s.m. a Al Plan</i>
Sab 28.	<i>Tomesc d'Aquino, Carlo le Gran, Karoline</i>
18:00	<i>s.m. prefestia a Al Plan</i>
19:30	s.m. prefestia d'aniversar por + Lois Pedevilla, Soröa 3. s.m. de sopoltōra por + Josef Kosta, Framacia s.m. por +ti Jep y Susanna Mühlmann, Baldessé
DOM 29.	4. domegna ia por l'ann - Festa de Sant'Ujöp da Oies <i>Valerio, Gerhard</i> domegna dai mass-media
08:30	gran messa por dōta la ploania <i>oferta por i debojūgns dla ploania</i>
10 y 18	<i>s.m. a Al Plan</i>
ampola:	por fam. Pedevilla, Soröa
ministronc:	► da doman y domegna: Alessia Costabiei y Denise Erlacher ► da sera y domegna: Stefan Taibon y Denis Trebo
i recordun:	Florian Baldissera + 22.01.2016

 **Sciūra fora la rei, te piarás cōrs!**



Gejú é tres en movimont. Al met man sōa misciun i va atira danter la jont. Al é el le "Regn dal Ci" co ven dampró, al é el co porta la bela noela che Dio s'ò bun y ò se salvé.
Por realisé sōa misciun ál debojūgn de colaoradús. Vigne cherdada de Gejú é n invit da gní protagonisè dla costruziun de so Regn.

Cherdemo, Signur, y damanemo da te gní do sòn strades magari manco sogüdes mo co dá plü entusiasim, sòn spones olá che i pó te daidé sciüré fora les reis y ciaté con la grandeza de to cör trec compagns nös. Bonamonter ne sarunse nia bun da fá atira ci che tö damanes. Al pó ester che i ái de vigne sort de vértoses por i sciampé a to envit. Mo tö no lascé da mo cherdé, supereia mia fraidité y fej fora de me en stromont, picio mo de üt, por la costruziun de to Regn.

La pordica dla munt cuntada ai mituns (1)



Gejú va sòn na munt

Gejú jea con sü amisc fora por i paisc. Al varía i püri, baiâ con la jont y respognea a sōes domandes.

La jont baiâ trep de Gejú y de sōes operes demorveia: al fajea endô odei i verc, ti tolea la tema ales porsones y cuntâ che Chelbeldio ti ò bun ai mituns, avisa tan co ai gragn. Tres plü porsones jea da d'el y el les ascutâ sō. Da endluch adalerch gnêres por l'odei con sü edli. Gejú orea ti baié a duc y duc dea l'aldí. Porchel él jü son na munt y la jont s'á abiné encer el ia.

Funziuns en onú de Sant'Ujöp Freinademetz a Oies



en sabeda ai 28 de iener:

ales **16:00 s.m.** con le cor de dlijia da La Val

en domegna ai 29 de iener:

ales **16:00 s.m.** con le quartet dal cor de dlijia da San Martin

ales **20:00 s.m.** con le cor de dlijia da Lungiarü

Dio, nosc Pere tal ci, te i as scinché a Sant'Ujöp Freinademetz na fede via y n cör plen d'amur; ensciö ál lascé sōa patria por jí y se dediché ales misciuns tla Cina. I te periun: dásse por sōa interzesciun ci ch'i adorun por nosta vita y stravérdesse da ci co pó ester de prigo por l'anima y le corp. Deidesse da confidé deplen te to amur y da emparé da conesce y da fá deplen töa orenté. Sant Ujöp Freinademetz, i te periun do töa interzesciun te nüsc fistidi y te nostes crusc. Te sas ci co nes stá por le moment a cör, porchel te periunse do to aiüt. Preiesse decá dantadöt na fede via y la forza da la vire tal amur a Chel Bel Dio y ala jont encer nos ia. Amen.